

Jo Nae Sire Se Paidā Huā Ho



jo nae sire se paidā huā ho

Born Again

by Bakhtullah

[Ao, Khud Dekh Lo 6]

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a collage of
BiancaVanDijk <https://pixabay.com/images/id-7318705/>;
geralt <https://pixabay.com/images/id-7771227/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Sachchāi Jānane kī Pyās	1
Jo Nae Sire se Paidā Huā Ho	2
Tairūngā Yā Ḍūb Jāūngā?	2
Hamārī Manzil: Āsmān kī Bādshāhī	3
Hamārā Wasīlā: Pānī aur Rūh	4
Rūh kā Andekhā Kām	6
Hamārī Rāh: Maslūb Masīh	7
Nūr ke pās Āo	8
Injīl, Yūhannā 3:1-21	10

Falastīn meñ ek izzatdār ādmī banām Nīkudemus rahtā thā. Ek rāt wuh Ḳhudāwand Īsā ke pās āyā. Us ne kahā, “Ustād, ham jānte haiñ ki āp aise ustād haiñ jo Allāh kī taraf se āe haiñ.”

Sachchāī Jānane kī Pyās

Nīkudemus ek dilchasp ādmī hai. Wuh ek baṛā ālim hai. Wuh jāntā hai ki al-Masīh āne wālā hai. Aur wuh use dekhne ke lie tarāp rahā hai. Ab Īsā al-Masīh sāmne āyā hai. Uskī bāteñ aur kām zāhir karte haiñ ki wuh Ḳhudā kī taraf se hai.

Parwānā battī se khinch jātā hai. Isī tarah jis ke andar sachchāī jānane kī pyās hai wuh Ḳhudāwand Īsā se khinch jātā hai. Yahī Nīkudemus kā hāl hai. Koī chīz Masīh meñ hai jo use khīñch rahī hai. Islie Nīkudemus us ke pās pahuñchtā hai.

- *Kyā āpke andar sachchāī jānane kī pyās hai?*

Jo Nae Sire se Paidā Huā Ho

- *Īsā Masīh jawāb meñ kyā kahtā hai?*

Wuh ek chaunkā dene wālī bāt farmātā hai. “Main tujhe sach batātā hūñ, sirf wuh shaḡhs Allāh kī bādshāhī ko dekh saktā hai jo nae sire se paidā huā ho.”

- *Kyā āpne kuchh note kiyā?*

Nīkudemus, Īsā Masīh kī baṛī tārīf kartā hai. Jawāb meñ Masīh ek bilkul alag bāt chhertā hai.

- *Kyon?*

Use Nīkudemus kā pyāsā dil sāf nazar ātā hai. Wuh jāntā hai ki kyā chīz is pyās ko bujhā saktī hai. Aur yih chīz nae sire se paidā hone kā amal hai.

Tairūngā Yā Dūb Jāūngā?

Nīkudemus pāk nawishton kī gahrī gahrī bāten jāntā hai. Ab wuh soch rahā hai ki yih ādmī kaun hai jo Īsā kahlātā hai. Wuh na sirf ek baṛā ālim hai. Us se baṛe mojize bhī ho rahe haiñ. Kyā yih wuh

najāt dene wālā hai jis ke intazār mein ham haiñ? Nīkudemus uljhan mein parā hai. Ab wuh rāt ke waqt ā gayā hai tāki sukūn se Īsā Masīh kī bāteñ sun le. Wuh mahsūs kar rahā hai ki main nahr ke kināre par kharā hūñ. Ab sawāl hai ki kyā main ghotā lagāūñ yā nahīñ? Agar lagāyā to kyā hogā? Tairūngā yā dūb jāūngā?

► *Jo bhī Ḳhudāwand Masīh ke huzūr ātā hai use is sawāl kā sāmna karnā partā hai: Tairūngā yā dūb jāūngā?*

Hamārī Manzil: Āsmān kī Bādshāhī

Masīh uskī pareshānī dūr nahīñ kartā balki use mazīd uljhan mein dāl detā hai: Tujhe nae sire se paidā honā hai agar tū āsmān kī bādshāhī dekhna chāhtā hai.

► *Yih āsmān kī bādshāhī kyā chīz hai?*

Pāk nawishte batā chuke the ki āsmān kī bādshāhī āne wālī hai. Matlab hai Ḳhudā kī bādshāhī āne wālī hai. Us waqt uskā duniyā par pūrā rāj hogā. Tab na sirf gunāhgāron balki

gunāh ko khatm kiyā jāegā. Yih ek naī duniyā hogī jis meñ na gunāh hogā, na jang aur na maut.

Yahūdī is bādshāhī ke intazār meñ the. Nīkudemus bhī yih bādshāhī dekhne kā pyāsā hai. Magar Masīh farmā rahā hai ki tum is bādshāhī ko sirf is sūrat meñ dekh sakte ho ki tum nae sire se paidā hue ho.

► *Yih kitnī ajīb bāt hai. Nae sire se paidā hone kā kyā matlab hai?*

Barē ālim Nīkudemus ko samajh nahīn ātī bāt. Wuh Masīh ko uksāne ke lie pūchhtā hai, “Kyā matlab? Būrhā ādmī kis tarah nae sire se paidā ho saktā hai? Kyā wuh dubārā apnī mān ke peṭ meñ jākar paidā ho saktā hai?”

Hamārā Wasīlā: Pānī aur Rūh

Īsā Masīh jawāb detā hai, “Maiñ tujhe sach batātā hūn, sirf wuh shaḳhs Allāh kī bādshāhī meñ dāḳhil ho saktā hai jo pānī aur Rūh se paidā huā ho.”

Pānī aur Rūh? Nīkudemus ko samajh nahīn ātī ki Masīh kyā kahnā chāhtā hai.

► *Kyā āpko patā hai?*

Ḳhudā ne Hizqiyāh Nabī se sadiyon pahle farmāyā thā ki

Maiñ tum par sāf pānī chhirkūngā to tum pāk-sāf ho jāoge. Hāñ, maiñ tumheñ tamām nāpākiyon aur butoñ se pāk-sāf kar dūngā. Tab maiñ tumheñ nayā dil baḳhshkar tum meñ nāī rūh ḍāl dūngā. Maiñ tumhārā sangīn dil nikālkar tumheñ gosht-post kā narm dil atā karūngā. Kyoñki maiñ apnā hī Rūh tum meñ ḍālkar tumheñ is qābil banā dūngā ki tum merī hidāyāt kī pairawī aur mere ahkām par dhyān se amal kar sako. (Hizqiyel 36:25-27)

Matlab sāf hai: Pahle, Ḳhudā al-Masīh ke wasīle se apne logoñ ko pānī se pāk-sāf karegā. Dūsre, wuh un ke saḳht diloñ meñ nāī rūh ḍāl degā.

Pānī pāk ho jāne kā nishān hai jabki Rūh ilāhī zindagī kā nishān hai jis se insān Ḳhudā kī rāhoñ par chal saktā hai.

Ek hī kām ke do pahlū haiñ: Jab ham Ḳhudāwand Īsā par imān lāte haiñ tab wuh hamen pāk bhī kartā hai aur hamāre andar apnā Rūh ḍāl detā hai jo hamen tabdīl kar detā hai.

► *Ġharz naī paidāish kā kyā matlab hai?*

Pānī aur Rūh aisā ilāhī kām hai jis se insān pūre taur par badal jātā hai.

► *Is kī kyā zarūrat hai?*

Insān apnī gunāhgār hālat kī wajah se Ḳhudā ke huzūr nahīñ ā saktā na jannat meñ dāḳhil ho saktā hai. Sirf wuh dāḳhil ho saktā hai jo pūre taur par pāk-sāf ho jātā hai, jis kā dil ekdam badal gayā hai.

Rūh kā Andekhā Kām

► *Lekin yih naī paidāish kis tarah zāhir hotī hai?*

Ḳhudāwand Masīh hawā kī misāl detā hai: Ham hawā ko na dekh sakte na use control kar sakte haiñ. Wuh apnī marzī se chaltī hai. Tab ham use mahsūs karte haiñ. Peṛoñ ke patte hilte haiñ. Paudhe hawā meñ lahlahāte haiñ. Ḳhudā kā Rūh bhī isī tarah hai. Wuh apnī marzī se kisī ke dil meñ ākar use tabdīl kartā hai. Use dekhā nahīñ jātā lekin us ke kām se insān Ḳhudā kī qurbat meñ chalne lagtā hai.

Hamārī Rāh: Maslūb Masīh

► *Ham yih naī zindagī kis tarah pā sakte haiñ?*

Ḳhudāwand Īsā khañbe par laṭke sāñp kī misāl pesh kartā hai: Jab Isrāīlī abhī registān meñ phir rahe the to ek jagah par wuh buṛbuṛāne lage. Natījatan bahutoñ ko zahrīle sāñpoñ se ḍasā gayā. Jab Mūsā ne un kī sifārish kī to Ḳhudā ne farmāyā ki “Ek sāñp banākar use khañbe se laṭkā de. Jo bhī ḍasā gayā ho wuh use dekhkar bach jāegā.”

Jis ne khañbe par laṭke sāñp par nazar kī wuh bach gayā.

Masīh ko bhī khañbe se laṭkā diyā gayā. Jo us par nazar kare wuh abadī maut se bach jāegā. Tab Ḳhudāwand Īsā ek bāt sunātā hai jo ek jumle meñ Injīl kī pūrī ḳhushḳhabrī pesh kartī hai:

Kyoñki Allāh ne duniyā se itnī muhabbat rakhī ki us ne apne iklaute Farzand ko baḳhsh diyā, tāki jo bhī us par īmān lāe halāk na ho balki abadī zindagī pāe. Kyoñki Allāh ne apne Farzand ko islie duniyā meñ nahīn bhejā ki wuh duniyā ko mujrim ṭhahrāe balki islie ki wuh use najāt de.

Nūr ke pās Āo

► *To jo ḳhushī kā yih paiḡhām qabūl nahīn kartā uskā kyā banegā?*

Ḳhudāwand Masīh farmātā hai: Allāh kā nūr is duniyā meñ āyā. [...] Jo sachchā kām kartā hai wuh nūr ke pās ātā hai.

Ḳhudāwand Īsā Allāh kā nūr hai. Jo us ke pās ātā hai us meñ yih nūr chamakne lagtā hai. Aur yih nūr us ke achchhe kāmoñ se zāhir ho jātā hai. Lekin jo andhere meñ rahnā pasand kartā hai wuh burā kām kartā hai. Us ke apne kām use mujrim ṭhahrāte haiñ. Is hālat meñ wuh āsmān kī bādshāhī meñ dāḳhil nahīñ ho saktā. Jo nae sire se paidā huā ho us meñ pāk Rūh bastā hai aur wuh Masīh ko taktā rahtā hai. Uskā dil us ke nūr se bharā rahtā hai. Wuh is duniyā meñ rahte hue abadī zindagī pātā hai.

- *Kyā mujhe naī paidāish mil chukī hai? Kyā uskā Rūh mujh meñ bastā hai aur main Masīh ko taktā rahtā hūñ? Kyā uskā nūr merī zindagī meñ chamak-damak rahā hai?*

Injil, Yūhannā 3:1-21

Farīsī firqe kā ek ādmī banām Nīkudemus thā jo Yahūdī adālat-e-āliyā kā rukn thā. Wuh rāt ke waqt Īsā ke pās āyā aur kahā, “Ustād, ham jānte haiñ ki āp aise ustād haiñ jo Allāh kī taraf se āe haiñ, kyonki jo ilāhī nishān āp dikhāte haiñ wuh sirf aisā shaḡhs hī dikhā saktā hai jis ke sāth Allāh ho.”

Īsā ne jawāb diyā, “Main tujhe sach batātā hūñ, sirf wuh shaḡhs Allāh kī bādshāhī ko dekh saktā hai jo nae sire se paidā huā ho.”

Nīkudemus ne etarāz kiyā, “Kyā matlab? Būrhā ādmī kis tarah nae sire se paidā ho saktā hai? Kyā wuh dubārā apnī mān ke peṭ meñ jākar paidā ho saktā hai?”

Īsā ne jawāb diyā, “Main tujhe sach batātā hūñ, sirf wuh shaḡhs Allāh kī bādshāhī meñ dāḡhil ho saktā hai jo pānī aur Rūh se paidā huā ho. Jo kuchh jism se paidā hotā hai wuh jismānī

hai, lekin jo Rūh se paidā hotā hai wuh rūhānī hai. Islie tū tājjub na kar ki main kahtā hūn, ‘Tumheñ nae sire se paidā honā zarūr hai.’ Hawā jahān chāhe chaltī hai. Tū uskī āwāz to suntā hai, lekin yih nahīn jāntā ki kahān se ātī aur kahān ko jātī hai. Yahī hālat har us shaḡhs kī hai jo Rūh se paidā huā hai.”

Nīkudemus ne pūchhā, “Yih kis tarah ho saktā hai?”

Īsā ne jawāb diyā, “Tū to Isrāīl kā ustād hai. Kyā is ke bāwujūd bhī yih bāteñ nahīn samajhtā? Main tujh ko sach batātā hūn, ham wuh kuchh bayān karte haiñ jo ham jānte haiñ aur uskī gawāhī dete haiñ jo ham ne ḡhud dekhā hai. To bhī tum log hamārī gawāhī qabūl nahīn karte. Mainne tum ko duniyāwī bāteñ sunāī haiñ aur tum un par īmān nahīn rakhte. To phir tum kyonkar īmān lāoge agar tumheñ āsmānī bātoñ ke bāre meñ

batāūn? Āsmān par koī nahīn chaṛḥā siwāe Ibn-e-Ādam ke, jo āsmān se utrā hai.

Aur jis tarah Mūsā ne registān meñ sānp ko lakaṛī par laṭkākar ūnchā kar diyā usī tarah zarūr hai ki Ibn-e-Ādam ko bhī ūnche par chaṛḥāyā jāe, tāki har ek ko jo us par īmān lāegā abadī zindagī mil jāe. Kyonki Allāh ne duniyā se itnī muhabbat rakhī ki us ne apne iklaute Farzand ko baḥsh diyā, tāki jo bhī us par īmān lāe halāk na ho balki abadī zindagī pāe. Kyonki Allāh ne apne Farzand ko islie duniyā meñ nahīn bhejā ki wuh duniyā ko mujrim ṭhahrāe balki islie ki wuh use najāt de. Jo bhī us par īmān lāyā hai use mujrim nahīn qarār diyā jāegā, lekin jo īmān nahīn rakhtā use mujrim ṭhahrāyā jā chukā hai. Wajah yih hai ki wuh Allāh ke iklaute Farzand ke nām par īmān nahīn lāyā. Aur logoñ ko mujrim ṭhahrāne kā sabab yih hai ki go Allāh kā nūr is duniyā meñ āyā, lekin logoñ ne nūr kī nisbat

andhere ko zyādā pyār kiyā, kyonki un ke kām bure the. Jo bhī ġhalat kām kartā hai wuh nūr se dushmanī rakhtā hai aur us ke qarīb nahīn ātā tāki us ke bure kāmōñ kā pol na khul jāe. Lekin jo sachchā kām kartā hai wuh nūr ke pās ātā hai tāki zāhir ho jāe ki us ke kām Allāh ke wasīle se hue haiñ.”